

Atleta di BMX, Zaythiel Soekandar:

Ta cla pa e Weganan Panamericano Toronto 2015

Aña pasa el a briya den e Weganan Centro Americano y del Caribe memey di tur e coredonan di caliber halto den e region aki.

Logrando algun bon resultado den e rondanan preliminar como tambe den e gran final unda e la sali na di seis luga, e coredo di BMX, Zaythiel Soekandar ta sinti cu awor aki e ta mucho mas miho prepara pa e Weganan Panamericano. Cada bes e haya e oportunidad di representa Aruba den un evento grandi e ta gana mas experiencia y cada bes su resultado nan ta satisfactorio.

Cu su apenas 4 aña di edad, e hoben Zaythiel Soekandar a cuminsa core bike cross. No tabata por otro, mirando



cu su tata Audi tabata un di e miho nan na Aruba den e deporte aki. Mas cu claro Zaythiel como tambe su ruman Zyqion kier sigui e pasonan di nan tata. Na un edad hoben ya caba Zaythiel a partic-

ipa na diferente competencia nan grandi di nivel mundial y aki ya caba por a constata cu e tin un talento unico y den futuro e lo por a bira un di e miho nan. Su estatura y e fisico fuerte forma ta caracteristicanan cu ta cuadra cu un coredo di bike cross.

Pa Zaythiel su preparacion a bay super bon. El a participa na algun competencia na Merca unda a obtene bon resultado cual e la yega den e final. E ta masha contento di por a haya e oportunidad un bes mas pa defende e bandera di Aruba. E sa cu cosnan no lo bay ta facil. Den e Weganan Panamericano lo participa e campeon mundial y dos medayista Olimpico, pero manera Zaythiel ta bisa cu den bike cross tur cos ta posibel, e deporte ta un di hopi riesgo. No obstante di



tur esakinan Zaythiel lo haci su maximo esfuerso pa logra un tremendo resultado pa

Aruba.

Despues di e Weganan Panamericano e lo concentra riba clasificacion pa e Weganan Olimpico di Rio 2016. E lo mester core varios careda di clasificatorio pa e por logra esaki. Su soño ta pa yega dicho weganan. Y e ta sinti cu e lo por haci esaki sin mas. E tin hopi aña den e deporte aki y ta mira un progreso enorme. Manera e ta bisa; "Bo mester tin hopi disciplina y tambe willing pa sacrifica tur cos pa logra bo soño. Traha duro y tur cos lo por bira un realidad. Dream Big." □

